

獨

漑

堂

詩

集

獨漉堂集卷之二 凡二集

羅浮陳恭尹字元孝

增江後集 小序

庚子春余歸自楚南其夏與何梁陶諸子掩關於新塘者二年辛丑之冬始爲羅浮之游自壬寅至戊申則掩關羊額爲多蓋二何子之家在焉而梁陶則所居近也其時室有糟糠之妻膝唯孩提之子家累蕭然可以經年不出亦可終年不歸戊申之夏先室奄逝繼以婚葬而兒曹漸長生事日繁不復能閉戶矣又六七年而有滇閩之亂所居當

東路之衝丙辰春乃挈家而西計自甲午僦居增  
江至是二十三年中爲江淮河漢之游者三年今  
自游之前者爲增江前集游之後至西還爲增江  
後集百歲人之大閑而居增江者四之一焉余之  
不忘夫增江者非一二端矣

古有乘車戴笠之謠其相逢必有歌蓋逸之也戴  
笠者歌曰

南園道蕭蘭不同芳共是三春草

答歌

墓門道高下不同望一種生春草

送董無休歸會稽歌

奈何別感予悲思昔與君初相知我之北君在南解君之策策兩驂我之南君將北我馬元黃不如昔五羊城東百尺浪欲送歸人行不得行不得爲君歌風乎谷中雲乎山阿雷入于地雨伏于河風雲雷雨颯然合下天上地爲滂沱雲搖雨散西風好願君且向山陰道南北分飛自偶然丈夫不受炎洲老

江水秋以洚關河上西而風翼翼之蓬我友于東東何歸歸會稽稽山陽稻與梁稽山背蒿與艾何以贈君贈自愛獨女不嫁鄰兒大欲往從之慎其對

子夜歌

新粧尙未成覽鏡自太息折取丹若花櫑子何能得  
待歡不下簾春風滅寒燭雲中見一星今夜成單宿

感懷

纖纖西林月待日生輝光幸假羽翼資與君同頡頏左  
提而右挈萬夫莫能當况我爲仁義相輔唯文章斷桐  
爲兩琴異形同宮商中心一相知異身同肺腸智慧如  
丹華華盛無再揚昂哉二三子久要期勿忘

密雲自西郊良苗望膏澤長虹久不散小雨滋蟊賊日  
月煎本根青黃變生色結髮爲老農終年不一穫高門

縱杯酒大笑糟糠客感念愚公言子孫世其力努力飾  
磁基春明候南陌

往者不可追來者不可期俛首爲今人舉體無一宣有  
目厭兵革有耳聞號啼有腹飽糠覈有足履禍樞赤舌  
有如火更以焚其軀

高臺臨廣池梧桐百餘尺上有一尊酒可以永今夕明  
月生東隅浩蕩無拘迫君子多暇豫小人聊燕息人生  
有如影終始爲形役拔箭射虛空箭盡弓亦折步出城  
北門壘壘山上石下有忘憂人千秋託松柏

荷絲織爲衣禦寒終不溫章句小儒生安識經與綸高

冠帶金玉端坐如鬼神輕車從肥馬游宴無冬春志士  
沈下僚能智豈獲伸大盜從西來擊鐘召羣臣空復見  
異類何以張吾軍大者爲雞狗鳴吠從他人小者如蛹  
蠶祇自營其身

九月悲風始邊土何慘慄積雪齊高城驚沙蔽寒日斧  
冰持飲馬鑿地求鼠實月盛角弓強三軍夜怕出合戰  
陰山下矢盡歸途失手斬郅支頭獻俘鳳凰闕闕庭侍  
從士臥起佳人側日晏下朝歸酌酒彈瑤瑟十年爲漢  
將甲胄行蟻蝨一語不相能投身對刀筆

事君如四時成功者爲客君子慎其言祇以求忠益小

人躁於名噉噉沽其直疾疚卒不除上下成乖隔爲臣  
固當戒爲君獨宜擇曲突弗先圖頭額爲焦灼忠言有  
如鶴佞言有如鵠鵠鳴人所喜鶴鳴人所噏

海濱何遙遙遙遙三千里一里一千家家家生荆杞空  
房乳狐兔荒沼游蛇虺居人去何之散作他鄉鬼新鬼  
無人葬舊鬼無人祀相逢盡一哭萬事今如此國家啓  
封疆尺地千弧矢人民古所貴棄之若泥滓大風斷松  
根小風落松子松根尙不惜松子亦何有

番禺古都會佳哉鬱嵯峨三江交洪流海水揚清波劉  
項爭帝業閉關自秦佗黃屋與左纛老夫聊自娛山川

足霸氣往往開雄圖中原鼎沸日肝腦塗干戈光岳氣  
雖分生齒存亦多海國誠富強金鐵兼鹽鹹百貨走天  
下五兵雄諸華盛朝爲外府亂政求金車使者道相望  
下民方薦瘥北臨漢臺上悵望傷如何

野犬吠行人深巷聞荒雞蕩子今何之有司在門閭朝  
出伏草間夜起匍匐歸有親誰當養有田莫耘耔豈敢  
負公家有罪誠當治甘瓜生井傍百尺蔓其枝禍來常  
無根免身爲令謀

夢登首陽山鬱哉何巍巍上有二子墳下有三春薇寧  
從白鶴巢不從鳳鳥飛白鶴來有常鳳鳥來無時子胥

耕吳野少伯因會稽一旦先埃塵千秋有餘悲

太息復太息百年同木石富貴比春華一落誰相識不如求令名高譽流丹青丹青雖可慕人命如朝露一身尙不存令名亦何附不如齊众生無我亦無名誠恐朽落時亦與木石并百足旣憐夔奔蛇復憐風是非百年內展轉何能窮

覽鏡在中夜莫辨影與形人苦不自知所賴友與朋圭璧貴攻瑕龍阿期發硎如何末世士懷利忘友生責望疑似間謾間忽然興陳張交里門白刃生侯王富貴尙相負貧賤寧相能結交始以義全交終以明安得兼黃

金以鑄鮑子靈

著我遠遊冠插我忘歸羽命駕將何之三星在南戶夕  
鳥下高林翩翩赴其侶人生各有志榮辱何常主浩歌  
擊白石與此聊終古誰能共碌碌身沒名不舉蒿里足  
黃塵徒增一棺土

豫章下山時顧與山靈語不爲棟與楹慎勿爲木偶木  
偶盛容委曳裾復拱手大匠持斧斤視之若無有叔孫  
名大儒綿蕞何草草蕭何刀筆吏無功獨居首

人飲濁河水不食古井泉古井非不清濁河誠有源大  
人畧細故瑣瑣安足論鸚鵡立樊籠焉用能人言蒼鷹

無羽儀一日翔九天

秋氣不成寐出戶月皎皎我生多憂虞及壯已衰老如  
彼霜下葉未落忽先槁當前一尊酒舉觴問蒼昊畢昴  
出東方天階靜如掃玉衡無右移白日不西曉如何六  
合內有此顛與倒

葉世穎重之中湘茅屋別後有寄

楚國木葉下故人行有霜離憂在湘水古色滿衡陽幾  
日歇蘭棹此時開草堂山川敎兒子指點洞庭傍

夏夜同梁藥亭朱竹庵

百感在深夜夜涼開小扉梧桐下堦影蝙蝠上堂飛初

月清光少中年舊友稀春來戀攜手空谷未成歸

喜陶苦子還自鹿步

無言終夕坐一雨散微涼自有碧天月隨君歸草堂荒  
池餘瀦上高柳小星藏世難兼多事爲歡苦不常

月夜懷王東村

王子知名早而今似老夫詩敍流俗怪癡愛美人扶隔  
歲書歸嶺他鄉月在湖滕王高閣上今夜擣虬鬚

夏日寄鐵機上人

自得傳心印年來出院稀苦吟詩體瘦蔬食病身肥地  
靜風吹竹池涼水濺衣空江相憶處白鳥夕東飛

宿羅浮飛雲峯候日出

仙山終古少行蹤  
絕頂良宵不易逢  
暗積落花歸上界  
倒懸明月照西峯  
江潮應瀑聲千里  
海氣成霞色萬重  
一綫日輪天已曉  
遠雞才報下方鐘

宿冲虛觀

碧削羣峯列四垣  
仙宮高坐不知寒  
春前螢火明丹竈  
夜靜流星落斗壇  
幾穴雕梁巢白蟻  
一家衰草住黃冠  
山尊對語梅花下  
福地而今路亦難

過薛劍公不值

竹窗虛掩讀書堂  
遠近游蹤日已黃  
舍瑟定偕童子去

采芝還入老人行苦侵舊綠緣金井花散高紅點石牀  
一度不畱君未惜年年歸路屬春陽

雨後登樓遲梁器圃不至

江樓頻約落花間亂世幽期豈待閒幾度鶯聲逢舊國  
二年春色各柴關新虹映日收殘雨積水浮天出斷山  
目極故人居可見布帆無恙夕空還

贈別屈翁山

落日臨大河游子有歎聲與君結交初十五侍親庭中  
間一杯酒各有萬里行飄颻沅湘水迢遞遼陽城歸來  
何所得白髮三四莖雲中有哀鳥遺我一尺繒上言所

相思乘龍冉遐征嗚呼永決絕況當別良朋踟蹰欲有  
言淚下先承纓丈夫射桑弧豈曰期一身大恥且不雪  
獨善有何稱

畫布作鴻鵠天下齊張弓哀哉晚世士不幸有其心有  
心尙可容有口能興戎願君爲堅金不願爲貞松松高  
風颶颶衆草難爲秋

屈翁山見過

潛魚脫於淵濡沫猶相依何況雙鶴雛羽翼當未飛別  
子未經旬中心恒苦饑析我園中薪言烹菽與葵小子  
從外來有客縕其衣披衣急出戶果諧心所思相攜厯

堂階歡極無文儀素琴爲君絃濁酒爲君開  
酒濁不可飲絃悲難重陳平生廢蓼莪念子有老親雖  
無爵與祿色養踰人珍回風自西來四海同其塵氣獍  
言大孝烏哺爲不仁勉哉反古道獨立如披榛葵花雖  
不實猶能安其根君子垂令名所以揚二人

海中吟

海中何所有有樹名三珠上有同巢鳥分飛從鵠雛西  
飛黑水頭北飛越黃河遠者啄玉門憂憂鳴天都路長  
羽翼短力盡歸其居上天天有弧入地地無塗口饑不  
謀食終日銜枯蘆人情有獨嗜此鳥寧謂愚解紛不以

拳弔死不以烏鳳凰其不來吾衰已矣夫

王將軍輓歌

南方有義士姓王名曰興十三學殺人十五手搏狼三十建義旗姓名驚一方天子錫虎符作鎮鼈江陽翠華日以遠地絕軍彌張百戰環岡州九死披殘疆海濱富斥鹵重林與連岡高者掩雲日遠者浮滄茫煮波致財貨鑄冶成刀鎗宮室何所居天家侯與王橐粟何所饋從駕子與嬪心膽何所贈海內豪與英獻客合浦珠薰客珠厓香客處未覺寒襖蓐先盈箱客寢始覺單妖麗忽侍旁敵兵四面來衆士各逞強將軍躍上馬命客

持一觴獨出揮長戈兩目流電光直取首來將生挾歸  
戎行顧飲所持酒昔熟猶未涼相持及三月敵騎皆奔  
亡來時三萬人半還仍重傷奏功自間道涉瘴徂昆明  
黃金三千鎰玉帛各有筐天駟方驅馳下臣效芻漿臣  
與昧死上 帝曰興卿良賚爵列五等高獸盤銀章其  
名曰虎賚將軍盪南荒敵人聞之懼選士盈千騎來者  
左右賢其軍督責之不得此彈丸若輩何生爲上天仍  
助虐其年兼荐饑將軍察天命命匠摵良材斷以爲巨  
棺綵雲縣歲饑約日出合戰敵怯不敢來堅壁十里外  
迺遷興長圍溝壘內外防突援無所施始從戊戌夏兩

及中秋期戰士飯草土抱骨還登陴所憂負將軍吾儕  
死猶歸將軍曰嗚呼共盡終何裨我乃報深恩汝當存  
宗支乃命幼子九先出卑其辭卜吉結歡會敵將不致  
疑是夜一更終將軍訣所知皎月當中天千秋同此時  
語已還閉門沐浴更裳衣夫人翠鳳冠有母頭如絲侍  
妾十五人左右皆肩隨肅肅何離離俱集園東陲上有  
古梅樹樛結垂高枝白石爲几席月露明蒼苔將軍命  
夫人拜別而慈闇拜畢與將軍四拜中間居十五妾羅  
拜窈窕無參差夫人命斗酒有脯形如圭深藏待今夕  
各當行一卮卮盡且先起母與君稍須將軍及母入燭

影何迷離夫人十五妾自掛臨中閨阿母大驚呼將軍  
言勿悲著我錦繡袍麒麟當心開戴我七梁冠簪纓鬱  
崔嵬玉帶與璽書次第皆抱懷置敕中堂上花燭榮且  
輝望闕遙謝恩臣死有餘辜下階十二拜天地及四隅  
徘徊望西堂有虎顧其兒平生愛此圖拜汝今同灰卷  
圖附敕下釋服趨房間房中何穹窿火藥堆如山將軍  
踏小几自解夫人縗次及妾十五列置火藥端出戶著  
朝衣袴敕仍來還一聲母急出火烈焰貫天雞鳴部曲  
入白骨空巒屹舉哀建素旒合斂歸巨棺敵人亦流涕  
况在同肺肝卜葬三山陽隱約題墓門陳子作輓歌播

之永不刊

珠厓歌送魏和公

交難古矣鄉里老死往來不悠悠行路者幾人  
而魏和公自寧都過余再信宿爲深知余不自  
知然也今涉海有珠厓之行滄波溟茫余旣不  
能爲謀安得止之於其去飲之酒爲珠厓之歌

歌曰

海之四壁天珠厓浮其間夫子客於斯則願祝安而往  
速而還已而已而使夫子客於斯後來者可以知其時  
也

崇禎皇帝御琴歌

甲申春 烈皇帝宴坐便殿鼓翔鳳之琴中曲  
而七絃俱絕 龍顏不怡良久未踰月而有煤  
山之變其琴流落人間濟南李家購藏之屈翁  
山具述見聞中座罷酒各請爲歌夫物猶如此  
哀哉

孤桐何生生嶧陽天家巧斲含宮商乾坤四序在胸臆  
七寶交盤雙鳳皇 烈皇宵衣坐璇殿欲奏南薰和赤  
縣朱絲七軫軫七絃一時迸絕 君王前 君王三月  
騎龍去神物潛行越河泗羅浮道士摵遺弓五拜親瞻

翔鳳字來歸泣語臨秋浦白日晶晶儻飛雨况乃風高  
水波立海隅咫尺非吾土豹之斑下人間鱷之橫出深  
阻掩君淚爲君吟彼琴者木木有心四海男兒何至今

春夜城西對酒歌

蒼天胡爲使我老百年飲酒苦不早學書學劍將何求  
富貴何如一春草西城北郭狐狸穴一墳未興一墳滅  
英雄事業滿丹青欲向何丘問枯骨且當把燭對朋儕  
千卮酬酢開中懷身後那能有知已有如月墜西江水  
萬丈光芒終已矣

秋日西郊謙集同岑梵則張穆之家中洲王說作

高望公龐祖如梁藥亭梁翫若屈泰士屈翁山  
時翁山歸自塞上

黍苗無際雁高飛對酒心知此日稀  
珠海寺邊游子合玉門關外故人歸  
半生歲月看流水百戰山河見落暉  
欲灑新亭數行淚南朝風景已全非

寄答方楚卿

羚羊峽裏憶同船江水盈盈十五年  
漢業不安分鼎地楚臣誰定勝人天思  
尊酒客歸鄉井攀栢孤兒守墓田三十  
無成慚父友報書惟有一潛然

耕田歌

耕田樂耕田苦樂哉樂有年苦哉不可言春未至先扶  
犁霜華重土氣肥春已至農事始雞未鳴耕者起泥汨  
汨水光光二月稻芽三月打秧五月收花六月垂垂黃  
再熟之田始有望三月打秧六月薅草一熟之田九月  
始得穫稻近路畏馬馬食猶寡近水畏兵兵刈何名上  
官不問熟不熟昨日取錢今取穀西鄰典衣東賣犢黃  
犢用力且勿苦屠家明日懸爾股

日本刀歌

白日所出金鐵流鐵之性剛金性柔鑄爲寶刀能屈伸  
屈以防身伸殺人星流電激光離合日華四射瞳瞳溼

陰風夜半刮面來百萬愁魂鞘中泣中原歲歲飛白羽  
世人見刀皆不顧爲恩爲怨知是誰寶刀何罪逢君怒  
爲君畫盛威與儀爲君夜伏魍魎水中有蛟貫其頤  
山中有虎抉其皮以殺止殺天下仁寶刀所願從聖人

繅絲歌

小蟲之大小指如君子之軀七尺餘鏽烹小蟲胡爲乎  
將以爲衣榮君軀君軀長君軀短小蟲之小絲有限中  
心抽盡君未煖

祭幽歌

天低野黑鐘磬冷高臺火炬紅無影招魂竹竿垂至地

萬衆無聲大師睡林根水際光宵冥欲動不動如有形  
陰風吹沙利如箭蚱蜢橫飛撲人面鬼王丈六鬚髮丹  
金鈴召鬼爭盤餐黃香插筵月晶晶瓦簋不盈紙衣小  
時候如聞笑忽而啼笑何丈夫啼女兒殘骸敗血生荒草  
有棺無棺安可保骨肉當前喚不聞半夜依人思一飽  
綠楊絲繞白楊樹魂來作風歸作雨西頭落日東頭來  
後人仍爲今人哀

猿聲歌

十八灘頭波突兀孤舟十夕不得發蒹葭敗葉鳴括括  
江天霜滿墜小月烏猿一聲一白髮

寄曾省之

分居嶺北南異地幸同心  
眶石能攻玉如蘭卽斷金  
君從卜肆隱子臥海門深  
春別不相送秋風勞夜吟

雨夜懷屈翁山

風雨懷人坐無燈亦到明  
流螢分夜色疎竹聚秋聲  
別酒尙餘醉春花今不榮  
終知吾與子白髮路傍生

送馬仲融之粵西

天際萬重灘灘邊萬仞山  
山風吹落葉只在客船間  
多難晦冥日少年離別顏  
倚闌方白髮莫不看刀環

秋夕梁素子載酒過宿

悠悠成老大處處閉柴關秋水鷺鷺外江村禾黍間何  
期良夜月得照故人顏把酒因成笑勞生不易閒

得梁藥亭燕臺書因懷石埭之行

同門三獻玉岐路已沾衣復鑛雙鸞翮居然後雁歸乘  
風潮蕩漾臨水葉翻飛牛渚高吟夜相思方掩屏

江上

青山此川上終古見如新可歎浮生者蹉跎卽老人暮  
雲高不動白鳥立無鄰獨往秋光裏雙橈與病身

送雁

數聲嘹嚙起汀沙亂點晴空暮影斜六翮欲衝遼海雪

一行先別嶺南花但令處處無飛檄莫恨年年不到家  
荇葉蘆芽春漸遍無窮烟水在天涯

望燕

封侯重領黑衣袴錦臆如花剪尾齊歲歲自來蓬戶裏  
雙雙飛出柳塘西清秋別我知何去舊壘歸心想未迷  
郭外沃田拋棄盡不憂無處覓春泥

易宣人過訪

衰草閒園鳥不飛海樓高坐每斜暉是誰肯問幽棲地  
有客身披隱士衣獨往肝腸憐汝小後來風雅見人希  
深談三日還三夜未放江門一棹歸

同何不偕梁器圃魏和公梁藥亭陶苦子宿靈洲  
山寺柬王說作王大雁

靈洲秋色淨無烟水匝山隅浪匝天落日客尋江上寺  
出林僧放月中船漁依別港燈侵閣鶴宿高巢影在泉  
欲與故人同夢到夜來吟詠不曾眠

寄易宣人

碧雲芳草徧河洲心逐歸潮到海樓謝氏門中多翰墨  
衛郎年少最風流入羣野鶴能驚衆出土新松卽傲秋  
近得孟光爲伴侶知君從此不低頭

太息

高臺爲陸沼爲塵一半揚州是海濱白鳥自飛烟水上  
青山不似亂離春松楸永隔興哀地陌路多逢太息人  
共道君恩憐物命不教魚鱉近居民

丙午歲旦漫題

鵠噪鶯鳴在四鄰鬢毛羞與歲爭新山妻灑酒相娛老  
稚子牽衣出拜人道不偶時聊自放詩非繇命莫教貧  
可能更得閒無事三十六回春草春

送何左王客游

平生林下共幽期至德如君是我師一日未曾離奉養  
十年不擬到城池貧當亂世娛心少老畏名山入眼遲

暫脫綵衣行萬里春江楊柳綠絲絲

同諸子再泛甘溪

停舟昨日蔭楓林不道江天便有陰落木寒臯前路在  
斷橋流水此時淡逢山每作終身計見雁重驚萬里心  
暫抱衾綈就漁父月明同聽柂歌音

懷古十首 燕臺

燕南燕北戰爭餘白草漫漫雪色初河渡堅冰通下博  
關門沙路走居胥必求馬骨言終驗生堪秦胸計已疎  
猶有興亡數行淚夜來彈與樂君書

姑蘇

澹烟疎雨闔閭城潮水千年恨未平寶劍賜來吳命短  
美人恩重父難輕宮梧葉落隨流出臺鹿春歸引子行  
何處扁舟人去後鑄金猶得似平生

楚中

衡雲巫雨暗江津江上孤吟過一春二女廟邊逢淚竹  
大王風急到青蘋虛無玉駟朝天闕慘淡雲旗降楚神  
終古靈均詞賦在湘南山水倍關人

咸陽

關門一夜柳條春今古茫茫草色新龍虎有雲終王漢  
詩書餘火竟燒秦瑤池西望猶通鳥渭水東流不待人

最是五陵游俠客年年磨劍候風塵

沛中

漢王生長難忘處尺土猶書故宅名四海自飛鴻鵠羽  
中宵人哭白蛇聲輕沙淺草堪調馬習俗羣兒敢說兵  
千載英雄同一轍徐州南是鳳陽城

洛陽

敝車駕馬雒城邊盛事空憑故老傳嵩室有聲君萬歲  
士圭無影日中天禮亡已驗伊川髮涕下徒傷賈傅年  
莫問漢家圖畫處丹青磨滅化苔錢

蜀中

子規啼罷客天涯蜀道如天古所嗟諸葛威靈存八陣  
漢朝終始在三巴通牛峽路連雲棧如馬瞿塘走浪花  
凝醉昔賢魚水地海棠開徧酒人家

鄴中

山河百戰鼎終分歎息漳南日暮雲亂世姦雄空復爾  
一家詞賦最憐君銅臺未散吹笙伎石馬先傳出水文  
七十二墳秋草徧更無人表漢將軍

金陵

山飛樓閣水飛霞冷落春城宿乳鴉天闕雙峰銛似戟  
海門高浪白如花空勞御輦銷王氣曾畫長江作帝家

五馬渡邊龍化後南方文物掩中華

隋宮

穀洛通淮日夜流  
渚荷宮樹不曾秋  
十年士女河邊骨  
一笑君王鏡裏頭  
月下虹蜺生水殿  
天中絲管在迷樓  
繁華往事邗溝外  
風起楊花無那愁

讀秦紀

謗聲易弭怨難除  
秦法雖嚴亦甚疎  
夜半橋邊呼孺子  
人間猶有未燒書

送屈翁山

萬里還家著綵衣  
三春惆悵別慈闈  
期君得似銜蘆雁

半歲南飛半北飛

二子廟

清風千載又誰加  
古廟荒壇落槿花  
欲薦春薇無處采  
西山元已屬周家

游獵詞

白鳳襜褕白玉驄  
銀鞍燈爚坐春風  
彎弓偶失青門兔  
心在天山雪色中

村居卽事

渚西佳麗舊層層  
綵薄朱欄畫未能  
却好夜來微檄過  
黃茅初見一家燈

青楓成血立河旁  
新築河橋百尺長  
猶是君侯留愛地  
縣人不肯種甘棠

絲絲寒雨濕飛塵  
草綠平田不是春  
伏犧山中雖有虎  
農夫爭避帶刀人

亥生由吏不由天  
酈毒隨身始出門  
却怪比鄰新病者  
七星壇上更招魂

纔生文字卽風波  
鬼哭雖然吏亦歌  
三尺龍泉方寸印  
不知誰較殺人多

秋晚雜興

悵望百年內寂寥  
天地間遙山宛然綠  
秋水澹何閒風

細鶴聲去月高漁火還貧居無不可但惜酒巵  
酒醒山衣薄蕭條林館秋夜蟲爭客語螢火共星流老  
態悲黃葉新髭報白頭淡慚北窗下終日見羅浮

月在日還上追飛遙向西西風昨夜夢知是武陵谿被  
服尙前古賢愚同一畦因悲少年意高氣吐虹蜺  
冷榻眠無次閒階立不歸池花向影落河雁帶聲飛水  
畔爲漁父城東卽布衣平生隨分得未覺此心非

繞屋落寒葉日高聞雁時紙窗明野馬齋鼎熟蹲鴟少  
事門開晚多吟臥起遲百年行已矣辛苦立名爲  
已矣復何道悠悠斯世間日唯催貌老天不與人閒水

定風頻起松高春未還薄田仍惡歲欹枕對秋山  
莫上荒臺望無端是旅情雲光過沼慢山影出林輕字  
宙何其曠蟬游似此生舊時歌舞地花落美人瑩  
枯草郭門西泉聲不辨溪虎林人讓路魚沼鶴爭泥託  
宿亂離後當時桃李蹊赦書寬酷吏噴噴在蒸黎

宿西臺精舍

無意成投宿心知此地稀樓臺銜石壁燈火聚漁磯疊  
浪千峯出當門百谷歸一宵吟咏冷多謝老僧衣

南海神祠下作

前有浴日亭

望遠孤亭盡憑高古殿尊碑畱千歲字神降百王言澑

水成天塹排山作海門登臨何限意稽首候朝暾

答家中洲

鳩鳥出草飛毛羽何翛翛昔爲韁上鷹今者居無巢豈若綵鳳皇高舉乘迴飈小音合笙管大音中咸韶攬德一來下至今空寂寥蕭蕭虞人羅千仞安可招倚伏本無門變化誰能料何時戾天翰從君鳴九霄

早發新塘浦向廣州東山舟中作

寡出春已生多愁老先及窮簷思良友凍浦命朝櫟依依海日上稍稍寒霧入人物象交晦明峯雲屢開闔火田赤尙燒水岸青猶溼秀色興遠林芳華冒平隰去日方

屢延歸流一何急前禽如退飛昔嶼乍遺粒菱蔓或浮  
沒石竅有呼吸傷哉逝川歎勵矣岐途泣百年曾幾何  
三十未能立

羅浮蝴蝶歌送屈翁山

羅浮大蝴蝶言是小鳳皇六足盤胸間四翅交文章修  
眉若楊葉繡腹如垂囊仙人愛文采挾之游帝傍雲霞  
爲友朋沆瀣爲酒漿倦息珠闕上饑采若木英四海安  
足飛來下君子堂堂中有行者比德共翶翔

懷何不偕

地平如板輿天廣如穹廬與君百年間托足曾無途右

臂七寶鞭左肩五岳圖跨鞍一俯仰去如流電趨朝飲易水頭夕秣越與吳道傍皆拊手太息此名駒

南客見毳毛安知可爲旃英雄在史冊寧無行路間夫子久飛遯徒步來南山長歌宮闕下北首望燕然龍德而蛇行誰能測其全夕醉王侯宅朝游俠少年

昨日異今日今吾猶故吾春風此何時白髮不我謀平生兩干邪動止必相須子抱荆山珍我握靈蛇牷良價一不值千駟猶泥塗埋骨置土中焉辨賢與愚修名懼不立歸哉南山隅

寄方蒙草

古道日以寡新知寧不歡與子別城隅惻惻還山間高  
窗落寒木白雁飛河干涼風改秋序永夜衣裳單十夢  
九見君不自知其端白璧照路衢過者皆盤桓諒無千  
尺繩繫我心與肝

入高峽懷梁藥亭

兩厓氣爭高千仞皆竦峙上窺摩蒼穹下視裂地紀叢  
峯互奔轅亂石相觸抵稜稜樹牙角躍躍列虎兕有如  
雨敵國各自堅壁壘汪洋牂牁江到茲伏不起我來霜  
雪後木落見山髓篙痕在半壁石路或傾圮繙想漲未  
消崩騰復何以維天有設險今則胡須此江海無波瀾

雄圖悵已矣揚船翫蒼翠吹笛娛心耳寧憂峽路長所恨風潮駛人生何以樂佳游對知己知已各西來一帆念東指思同山上石獨立望君子

峽上有似人石

游七星巖

立馬眺平蕪蕭蕭見蒼壁不知何處雲飛作茲山石嵯峨各異勢紛詭非一色旁通類戶牖中虛成室宅藤根上鬱盤石乳下涓滴時間鐘磬鳴宛若仙源隔靈峰互虧蔽微徑緣空隙頗疑混沌初有此機巧迹遨遊茲已屢歲月真如擲川原無古今世事空疇昔徘徊倚層巔北風感行客

登羅浮

八桂秘南經雙山雄粵望偉哉昔所聞於今觀其狀彌天列青靄絕地聯層嶂掩苒草木平陂陀谿谷壯誰言盛積阻極目何超曠雲巒時絕續泉聲日奔放飛樓候朝瞰倒影排溟漲相傳蓬島來負矣陶唐尙事往誠莫稽跡湮理無妄擣禽應白杵暗虎懷仁讓蟲書篆符竹蝶化遺衣桁繫維羽人宅信此餘風暢陰崖饒異產神藥滋蓋藏名遺炎帝書類絕嵇含訪伊昔休明會位與王侯抗時勤玉璽封未昧高山嚮望秩禮久虛旱魃人猶仰我來仲夏月溽暑陽方亢臥聞夜來雨飛出龍池

上何因需九州蒼生企靈覲

宿寶積寺

躋險力未疲白日停西峯將酌石上泉迤邐投雲松幽  
寺肅古苔絕壁懸高窗列席就清陰開襟面涼風石牀  
倚林標遠眺千里江原野漸微沒井邑方空濛今古一  
朝暮宇宙何終窮茫茫大夢內往哲畱其蹤聊爲命觴  
壺冥寄開心胸

游黃龍洞

春草夏更長洞門藹餘綠晨興理孤策衣露時霏渥繩  
邈睇衆峯逶紆赴長谷粼粼涉溪影蕭蕭翳巖竹風磴

炫雜花雲潭亂雙瀑沫雨晴驟飛游鱗清可掬荒宮久  
榛莽石岸多隈曲方齊昔人蹤茲焉遂幽築

冲虛觀

浮生無百年脆質今二毛言尋仙人居焉憚登陟勞褰  
衣遵澗曲輟棹逾平臯輕風澹餘雲仰見巖岫高真宮  
敞峻宇飛陛臨層霄羣峯列垣墉衆壑深溪橋石池曜  
紅蕖乳竇凝金膏猿鳥分夜鳴林泉聲相遭緬懷著書  
人丹砂樂南交幽洞俯日月天路流雲璈慮釋神必凝  
理得形自超安知後來者澹蕩非吾曹

贈別朱子蓉

石鼓響枯桐琥珀拾纖芥聲氣各有期類聚焉足怪夫  
子本世胄弱冠懷慷慨著書東谿陽四海方橫潰抗志  
師古人屈身慙後代昨來匡廬頂更躡羅浮背中夜見  
朝曦陵高閣九派清曠慨奇懷浩渺澌資揮灑長揖王侯  
前矩步炎州外雖抱柳下和無傷首陽隘蹇予臥丘園  
貞疾恒不瘥握手涉旬時方舟更逾邁高曲雖和稀宿  
心爲一快如何萬里別復此三秋屆草木變以衰溪山  
明可畫去燕戀匹儔歸雁投蒲稗離居易永久觸物多  
歎喟何時御輕風相尋越江介

夏初郊行

同程周量梁藥亭

僕本草澤人信宿滯城闕出郊見蒼翠超然百憂失連  
峰上不窮衆芳渺如一凝雲遠樹雜冒水新苗出升高  
望海郡千里何飄忽極浦映日明滄流際天畢曠心旣  
以怡素交復投漆揮杯酌流光百年偶茲日

答別余生生

升高望千里我心傷如何何況千里外送子歸巖阿巖  
穴匪君鄉甲第在京華莽莽戎馬時伏處亦已多霖雨  
不澤物積之猶爲波至人不爲龍無乃將爲蛇及時念  
先人匪獨爲君歌

進帆石門懷古

春至景漸暄舟行日堪玩矧抱昔人心而懷斯世歎平  
陂互倚伏今古如宵旦石門雖夙游風物亦殊觀積帙  
啓奔流平沙衍高岸帆迥斷颺急棹去餘萍散融融出  
渚雲役役將歸雁卷舒寧自期寒暑爲誰換浮生貴不  
朽金石有銷爛仰羨樓船人英聲烜西漢

贈別陳岱清

旌旗集枉渚舟楫辭河渭元冬首北路白日方南馳霜  
江無濁流落葉縱橫飛揚越非殊鄉山川中間之離別  
忽千里浩歌臨路岐

乙巳清明日擬杜七歌

我祖之塚蘿山陽昔者沃土今遐荒十里燃烽五里堠  
白日黯黯旗飛揚手栽三松何松長誰其守者豺與狼  
嗚呼一歌兮歌聲促海隅是日家家哭

有墓有墓江一隅我之祖妣從其姑連山百里鬱相望  
雕虎白晝乘黃狐牂牁水長墜飛烏篙師較計錢有無  
嗚呼二歌兮歌不得蒼天貧我曷有極

父兮母兮曾城側饑烏巢我墓上柏清明重九始一來  
人壽幾何天罔極瘞中龍劍躍且嗚有子雖長不得力  
嗚呼三歌兮淚未歇餘名豈足榮枯骨

丹水之山白玉英我昔三弟皆才良三歲讀書驚座客

六歲通經言有章鳳凰巢覆卵亦毀舉杯醉汝來何方  
孤飛之鳥落後行一矢可折十矢強嗚呼四歌兮傷懷  
抱汝兄雖存今已老

青青者蓑下見足小民命此以爲屋朝餐薇蕪暮黃獨  
舊隴有苗不得熟父兄母子各一方空山白骨無人哭  
嗚呼五歌兮歌思悲我生猶及承平時

平原紙飛掛長棘幼子孤墳在西北桄榔生風溪水黑  
青坭汙汝好顏色去年四歲解學書今日聞歌莫應識  
嗚呼六歌兮歌且疑天道反覆難得知  
生不能彎弓騎大馬含毫伸紙徒然者千鈞之重懸以

絲低頭淟涊聊復爲下有管樂上伯夷高人嗤我今何  
之嗚呼七歌兮歌聲闋男兒蓋棺是非決

廣州客舍夜雪歌

季冬二十日始暝元雲四塞天氣凝小雨初從屋角來  
漸覺蕭蕭駭羣聽開軒出立白照眼把燭低看雪墳徑  
紛披相屬聲更希委積爭高色逾瑩童子盛歸錦袖中  
主人爲續清尊興千卮酬醉未顏酡百巧雕鏤隨手應  
入饌猶疑虎作鹽迎春不數銀爲勝夜淡氣象慘更急  
臥久衾裯寒不瞑俱言黍稷兆維豐滿把瓊瑤曉相贈  
從來見少怪者多亦似西人驚海波歲維丙午日亦丙

支寅時戊還相加南州炎德濟以水此物或匪千天和  
將無治世氣自北却恐侵人鬢先白俟河之清尙有時  
如粵之雪難再得如粵之雪難再得爲君作歌興殊極  
彼蒼此意誰能測

麥叔夏齋中畱別

結侶卽諸昆淡居不鑿門小梯行木末虛牖納山根念  
別來初夏心傷是故園辭君返寥寂形影自相存

扶胥觀日出歌

天外千峯沈不起銅龍漏斷銀蟾死天雞大叫驚海水  
海水蒸變生火雲赤輪微轉天地分

張穆之畫鷹馬歌

張公捉筆初無意亂點離離墨光漬袖手方迴慘淡思  
滿堂忽作飛騰勢尤工畫鷹與畫馬豈有鬼神立其臂  
是何意態奇且傑歷落高淡見胸次蓋聞夫子俠者流  
少年唾手燕然地縱橫青史一千年顛倒文韜三萬字  
破膽親持與衆嘗許身不惜爲人碎老來伏懸有餘悲  
紙上鷹揚猶負氣叩心自昔飛炎霜白虹乃爲荆軻至  
况君精誠委筆墨僧繇破壁將無是我有填胸萬古愁  
百神不語羣仙醉請君放筆作雙鸞夜半騎之間天帝

柏舟行爲區母陳太君賦

太君愧我陳大夫之女也許適見五區大夫之  
子寶宸文學文學早卒太君當未笄之年矢靡  
他之節于今五十矣同人嘉其志有成繪圖爲  
祝予旣爲之序復作此歌

柏舟兩髦猶可儀陶嬰黃鵠曾雙飛夫人爲婦已頭白  
眼中未識君容輝自言生長大夫女經史胸襟炳如炬  
父母有命兒有心縱不言承己心許心期頡頏同一林  
天敎殊絕成辰參人生意氣貴一諾妾寧負天不負心  
妾父有男妾有姊君家大夫君一子有妻於俗得立孤  
無妻爲殤終已矣素車白馬入君門繇來爲義非爲恩

身安分命甘若薺半生衣枕無啼痕當年十五今五十  
嗣子成立皆有孫嗚呼男兒陷胸絕胆死容易就義從  
容人所畏青闥冉冉盛年徂誰能獨宿終不渝千金之  
劍贈墓樹至今談者猶區區何況贈以千金軀乃知未  
仕報韓者古今所以爲丈夫

王華姜哀詞

大風覆鳥巢有雛東南飛妾生始三朝將軍陷重圍臣  
忠子孝死父兄同日糜城中數萬人斬掠無一遺男爲  
刀下肉女爲爨下泥阿母任夫人毀貌爲僮奚納妾於  
中懷祝天兒勿啼誠禱理或應凶禍中脫離奔走依諸

姑不幸先而摧丈人爲侯公孤子未及期抱兒揖阿母願得相提攜阿母左乳兒右手與妾乳中間綴兩淚不絕隕如雨六歲敎妾書八歲敎鍼縷十四女工成餘巧及絃柱生世本將家上馬殊跋扈秋千及圍棋事事過儔伍阿母雖暫歡亦約之規矩時時垂訓言言稱阿父十七母捐背妾念不欲生阿母與父兄節烈當誰明食則忘酸鹹衣則忘炎涼忍死待須臾豈復有他望侯公後夫人有弟曰趙公結客滿天下好義爲士雄建牙古雁門白馬如游龍侯公家固原音問時交通聞有代州騎懽躍趨堂中玉帛雜沓陳簫鼓何逢逢姊妹私相

語此事來何從侯公發書喜顧妾言從容阿舅爲汝媒  
嘉禮今來降云有屈氏郎才妙時無雙聞命掩耳走面  
頰爲之紅良吉旣有期妾豈得自專兼云盛文藻私心  
亦愜焉先君與母兄庶幾藉言傳固原至代州長途彌  
三千後車載帳幙導騎明旌旃和鈴鳴我側悲笳紛我  
前與君爲兄弟恩義相纏綿方君讀經史爲君緝韋編  
方君弄柔翰爲君拂華牋君歌妾按節君琴妾操縵君  
行妾接跡君立妾比肩當坐共茵縷當酒共杯棬當鏡  
共形影當食共芳鮮當燭共更漏當月共櫺軒於夢共  
所適於心同所憐君母在嶺南妾得不同旋北風縮馬

毛驅之出雁門產女未彌月懷中嘗苦寒憶我初生時  
念母涕漣漣北首出雲州東路從幽燕柁舟下直沽天  
凍澤腹堅水工日椎鑿冰利舟爲穿揮鞭歷齊魯南度  
踰長川時登秦淮上悵望東南天烹我榆肉羹開我蒲  
桃尊爲君慰勞倦中夜鳴清絃東南誠水國舟路多洄  
沿舉首輒觸篷引足卽抵舷妾本鞍馬人動止頗非便  
炎洲况蒸濕怛慮不自全旣至見君姑霜鬢無一元子  
婦堂下拜姑喜倍萬千雞鳴天欲晨妾起拭衣巾上堂  
問安否下堂餚羞珍承志於未形纖細敢不勤小姑與  
叔姒愛我踰所親君家朋好多一一皆令聞切磋及文

筆相與期于春從容論前烈及我先將軍每從壁後聽  
慰幸竊自安苟活二十年微願今獲伸昔我母夫人同  
穴情所敦豈不以妾故忍死爲後殉男生圖嗣續女生  
亦何云但令父母兄大義炳無泯妾敢戀今樂而忘昔  
苦辛賦命固有涯皇天良不仁旣孕不終育凶疾嬰其  
身上負七十姑供養誰朝昏下顧所憐女肝心毒如焚  
鬼伯一相催欲畱終無因願君垂令名妾下報二人

獨漉堂詩集增江後集

獨漉堂集卷之二終